

## Inougurashon Plenchi Ramez (Ronchi) Isa

*Palabranan di Dr. E. D. Tromp na okashon di Inougurashon Plenchi Ramez (Ronchi) Isa  
17 di oktober 2001*

Damas i kabayeros,

Awe tardi, na e okashon speshal aki, mi ke kuminsá mi introdukshon ku sita di un karta for di un buki di e konosido outor Paulo Coelho ku a kompilá un gran kantidat di karta, poema i pensamentu di Jibran Khalil Jibran.

Khalil Jibran, manera e ta konosí pa miónes di admirador literario den tur skina di mundu, a nase na desèmber di aña 1882 i probablemente ta e poeta, pintor i pensadó mas famoso ku e suela di Lebanon a produsí. Su talento úniko pa poesia i su sabiduria ku ta revelá un inspirashon kasi dibino a hasi posibel ku hopi di nos a siña komprondé aun mas mihó e bunitesa i sentido di nos existir.

Den e karta ariba menshoná i fecha 14 di yanüari 1922 e ta duna su lektornan e siguiente konseho:

“Purba haña sa e loke ta e mihó ku ta biba den un hende i bisí’é esei tambe. Nos tur tin mester di un motivashon asina. Kada bes ku nan elogiá mi trabou, mi ta bira mas humilde pasombra mi no ta sintimi ni balotá no indeseá. Tur hende tin algu ku ta meresé di ser elogiá. Palabranan di elogio ta nifiká kompreshon. Den profundidat di nos alma nos tur ta hende maravilloso i ningun hende no ta mihó ku e otronan. Siña konosé e grandesa di bo próhimo i lo bo mira bo mes grandesa tambe.”

E palabranan di sabiduria di e gran yu di Libanon aki a inspirá algun di nos pa pone aun mas atenshon na e grandesa di nos siudadanonan i muy en partikular na esnan ku a pone un fundéis sólido pa e komunidad di awe. Hasiendo esei nos bista a kai fásilmente i direktamente riba e persona di Ronchi Isa ku durante di dékadanan largu a sirbi nos komunidad komo abogado magnífiko, parlamentario ekselente i gran estadista.

Ronchi Isa a nase na Kòrsou for di mayornan ku, pa kasualidat, tambe meskos ku Khalil Gibran ta frutanan di e suela di Libanon. E manera ku durante di su karera briante ela desplegó dedikashon, konosementu i sabiduria a hasiele sin mas un di e estadistanan di mas grandi ku nos pais a konose.

Nos komo Amigunan di Ronchi Isa a konsiderá ku ta na su lugá pa preservá e herensha polítiko i intelektual di Ronchi Isa pa futuro generashonnan den un buki ku e titulo: Ronchi Isa; Grootheid in Eenvoud. E buki su kontenido ta relatá e grandesa ku nos tur mester keda rekordá i relatá na nos yunan.

Awe tardi nos ke komplementá e trabou intelektual aki ku un muestra infrastruktrual di nos apresio pa su trabou.

Nos komo Amigunan di Ronchi Isa ta sumamente kontentu ku riba nos petishon Straatnamcommissie i Gobièrnu di Kòrsou a aprobá pa duna e plenchi aki e nòmber di un di su yunan.

Plenchi Ronchi Isa ta simbolisá e fundeshi ku Ronchi Isa a pone pa nos tur i pa nos yunan.

Ronchi masha danki.